

Morning Regional Dogri News Bulletin, 28th October 2024

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

1. प्रधानमंत्री नरेन्द्र मोदी होरें डिजिटल अरेस्ट दे नां पर चला'रदे फ्रॉड पर चिंता प्रगट करदे होई लोके ते जालसाजे दिएं गल्लें च नेईं औने लेईं आखेआ ऐ।
2. "मन की बात" कार्यक्रम च प्रधानमंत्री नरेन्द्र मोदी होरें मकामी सांस्कृतिक विरसे गी बढ़ावा देने च जम्मू कश्मीर दी कैलीग्राफी दा महत्व उजागर कीता। जम्मू दे लोक कलाकार सारंगी वादक गौरी नाथ हुंदा बी जिक्र कीता।
3. उपराज्यपाल मनोज सिन्हा होरें जम्मू कश्मीर केन्द्र शासत प्रदेश स्थापना दिवस ते राष्ट्रीय एकता दिवस दिएं तैआरिएं दी समीक्षा कीती, नोजवानें गी 2047 तगर भारत गी विकसित मुख्य बनाने दे लक्ष्य गी हासल करने च योगदान देने लेईं आखेआ।
4. जम्मू कश्मीर च सर्तकता जागरूकता हफता मनाया जाग, मुख्यमंत्री इस मौके "इमानदारी दी सगंध" चुक्कगंन।
5. साइंस ते टेकनालोजी मंत्री डॉ. जितेन्द्र सिंह होरें आखेआ ऐ जे भारत दी अंतरिक्ष अर्थबवस्था मुख्य दे विकास च महत्वपूर्ण योगदान देग।

<><><><><><>

PM-Digital Arrest

प्रधानमंत्री नरेन्द्र मोदी होरें डिजिटल अरेस्ट कन्ने सरबन्धी मामलें पर डूगी चिन्ता जाहिर कीती ऐ। आकाशवाणी पर प्रसारित अपने मन की बात कार्यक्रम च मोदी होरें आखेआ जे जांच अजेन्सियां राज्य सरकार कन्ने रलिए इस भेठा कम्म करा र दियां न तां जे नेइएँ घटनाएं गी होने था रोको जाई सकै। उनें गलाया जे कनून मूजब डिजिटल अरेस्ट सरबन्धी कोई प्रावधान नेई ऐ। प्रधानमंत्री होरें डिजिटल सुरक्षा आस्तै त्रै उपाएं दी चर्चा कीती। एह उपा न—रुको, सोचो ते करो। प्रधानमंत्री होरें आखेआ जे इय्ये नेह जतनें ते सौहगा रौहने कन्ने डिजिटल सुरक्षा गी यकीनी बनाया जाई सकदा ऐ। अपने सम्बोधन च प्रधानमंत्री होरें सोशल मीडिया पर आत्म निर्भर भारत ते नमिएं काहडे बारे गल्ला सांझियां करने लेईं गलाया। प्रधानमंत्री होरें अपने कल आले कार्यक्रम च 2

महान नायकें सरकार वल्लभ भाई पटेल ते विरसा मुंडा हुंदा बी जिक्र कीता ते गलाया जे इंदी 150मीं जयंति गी साल भरै आस्तै मनाया जाग।

<><><><><><>

PM-Calligraphy

प्रधानमंत्री होरें अपने संबोधन च कैलीग्राफी दा बी जिक्र कीता। उने आखेआ जे अज्जकल जम्मू-कश्मीनर च मुकामी संस्कृति गी लोकप्रिय बनाने आस्तै कैलीग्राफी दा इसतेमाल होआ र'दा ऐ। उने अनंतनाग दे फिरदौसा बशीर दा जिक्र कीता जिनें गी कैलीग्राफी च महारत हासिल ऐ। उने इसदे राएं मकामी संस्कृति दे बक्ख बक्ख पहलुए गी उजागर कीता ऐ। मोदी होरें आखेआ जे इस चाल्ली दे जतन उधमपुर दे गौरीनाथ होर बी करा र दे न। ओह इक सदी सोयां बी मती परानी सारंगी दे राएं डोगरा संस्कृति ते विरासत गी बजाने ते ओहदे संरक्षण च रुज्जे दे न। उने आखेआ जे पूरे देशै च ऐसी असाधारण प्रतिभा आले केंई सारे लोक न जेडे अपनी प्रतिभा कन्नै मुकामी धरोहर दा संरक्षण करा र दे न। जम्मू संभाग दे वरिष्ठ सारंगी वादक गौरी नाथ हुंदा जिक्र प्रधानमंत्री होरें अपने मन की बात कार्यक्रमै च कीता। इस पर अपनी प्रतिक्रिया दिंदे होई उधमपुर दे बसनीक गौरी नाथ होरें प्रधानमंत्री हुंदा धन्नवाद कीता। उनें आखेआ जे हून नौजवानें गी इस प्राचीन संगीत उपकरण ते एहदे नै जुड़ी दी संस्कृति बारै जानकारी मिलोग।

<><><><><><>

LG-Education

उपराज्यपाल मनोज सिन्हा होरें नौजवानें गी जीवन च नमां लक्ष्ये तय करने च गतिशील, मुकाबले आह्ला माहौल ते ज्ञान दे मंच दा लाह ठोआने दा आह्वान कीता। श्री सिन्हा होरें आखेआ जे इस महान राष्ट्र दे नौजवानें गी विकसित भारत 2047 दे विजन गी सच करने च योगदान देना लोड़चदा ऐ। ओह कल शोरे कश्मीर कृषि विज्ञान टेक्नोलाजी यूनिवर्सिटी स्कास्ट कश्मीर च अमर उजाला समूह आस्सेआ आयोजित मेधावी छात्र सम्मान समारोह गी संबोधित करा करदे न। तोआई, एल.जी मनोज सिन्हा होरें राजभवन च राष्ट्री एकता दिवस, रन फॉर फन एकता कार्यक्रम ते जम्मू-कश्मीर केंद्र शातिस प्रदेश स्थापना दिवस दे सरबंधै च कीता जा'रदियें तैयारियें दी समीक्षा आस्तै इक्क बैठक दी प्रधानता कीती। श्री सिन्हा होरें इनें कार्यक्रमें गी अमन-रमानदारी ते सुचारु ढंगै सिर मनाने आस्तै सब्बे लोड़चदे प्रबंध यकीनी बनाने दे निर्देश जारी कीते।

<><><><><><>

LG-Felicates

उपराज्यपाल मनोज सिन्हा होरें प्रशासन दे अधिकारिएं जम्मू कश्मीर पुलस, सेना वायु सेना, केन्द्रीय पुलस बल, आपात ते सेहत सेवा, श्री अमरनाथ दी श्राईन बोर्ड ते स्वयंसेवकें गी श्री अमरनाथ दी इस ब'रे आली यात्रा दा हिस्सा बनाने ते उसी सफलतापूर्वक सम्पादन करोआने लेई सम्मानित कीता। इस बारे राजभवन च इक कार्यक्रम आयोजित होआ। उपराज्यपाल होरें ाबने दी इस यात्रा गी सुचारु ते बवस्था आले ढंगै सिर करोआने लेई सराहना कीती। उनें आखेआ जे सब्बने दे सांझे जतनें कन्नै एह मुमकिन होई सकेआ। इस ब'रे दी श्री अमरनाथ जी दी गुफा च 5 लख 12 जहार 252 श्रद्धालुएं मत्था टेकेआ ते शिवें दे हिमलिंग रूपै दे दर्शन कीते हे।

<><><><><><>

JK-Arrest

जम्मू कश्मीर पुलस नै उत्तरी कश्मीर दे हंदवाड़ा थमां आतंकवादी दे इक सहायक गी गिरफ्तार कीता ऐ। ओह्दे कब्जे थमां सुरक्षा बलें असला ते बरूद बी बरामद कीता ऐ। इक टकोह्दी सूह पर कारवाई करदे होई जम्मू कश्मीर पुलस, राष्ट्रीय राईफलज ते सीआरपीएफ नै आतंकवादिएं दे सहायक गी चानचक्क लाए गेदे इक नाके थमां फगड़ेआ। तपाशी दरान ओह्दे कब्जे थमां असला—बरूद जेह्दे च इक पस्तोल, 2 मैगजीनां, 12 रौंद ते इक मोबाइल फोन शामिल ऐ, बरामद कीता गेआ। हंदवाड़ा दे पुलस थाने च इस सरबंधे च मामला दर्ज करी लैता गेआ ऐ ते जांच शुरू कीती गई ऐ। एह अभियान राष्ट्र विरोधी तत्वे गी जड़ थमां खत्म करने प्रति जम्मू कश्मीर पुलस दी वचनबद्धता गी दर्शादा ऐ। पुलस ते सुरक्षा बलें आम लोकें आस्सेआ लेइएं जानकारीएं दा सुआगत कीता ते भरोसा दोआया जे इंदे पर बनकदी कारवाई कीती जाग।

<><><><><><>

Vigilance-Week

जम्मू—कश्मीर सरकारै अज्ज ानि 28 अक्तूबर गी औपचारिक संगंध चुक्कने आहले समारोह कन्नै विजीलैंस जागरूकता हफ्ता 2024 मनाने दा ऐलान कीता ऐ। मुख्यमंत्री उमर अब्दुल्ला होर श्रीनगर सचिवालय च सी.एम चैंबर दे मीटिंग हाल च बड्डलै 11 बजे ईमानदारी दी संगंध दोआडन। सब्बने प्रशासनिक सचिवें गी इस मौके पर मुख्यमंत्री हुंदे कन्नै शामिल होने लेई सादा दित्ता गेआ ऐ। जम्मू च मौजूद सचिव ते होर दुए आला अफसर इत्थुआं गै कार्यक्रम दा हिस्सा बनडन। इंदे अलावा डिविजनल कमिशनर, डी.सी ते मैहकमे दे अध्यक्ष अपने—अपने दफतरें थमां वीडियो कांफ्रेंसिंग राएं कार्यक्रम च शामिल होडन। इनेंगी अपने—अपने मैहकमे दे अमले गितै इससै चाल्ली दी संगंध चुक्कने आहले समारोह दा सरिस्ता करने लेई आखेआ गेआ ऐ।

<><><><><><>

Jatinder Space

सूचना ते प्रौद्योगिकी मंत्री डॉ. जितेन्द्र सिंह होरें आखेआ ऐ जे भारत दी अंतरिक्ष अर्थबवस्था मुल्खें दे विकास च मता महत्त्व आला रोल अदा करोग। इक प्राइवेट मीडिया कन्नै अपने इक इंटरव्यू च डॉ. सिंह होरें आखेआ जे सरकार नै अंतरिक्ष क्षेत्र लेई इक ज्हार करोड़ रपे दी रास पूंजी लाई ऐ ते बायो ई—थ्री पॉलसी बी शुरू कीती ऐ, जेहदा मकसद जैविक अर्थबवस्था तैआर करना ऐ। मंत्री होरें इनें पैहलकदमिएं पर लोह पांदे होई मंत्री होरें आखेआ जे इंदे नै ना छड़ा भारत दी साइंसी दक्षता होर बधोग सगुआं एह टिकारु ते आत्मनिर्भर अर्थबवस्था तैआर करने च बी योगदान देग जेहदे नै उद्योग ते संस्थानें दे क्षेत्र च भारत विश्व स्तरें पर होर अगड़े बधोग।

<><><><><><>

Minister Rana

जल शक्ति, जंगलात, पर्यावरण ते जनजातिएं मामले दे मंत्री जावेद अहमद राणा होर पुंछ जिले दी पीर की गली ते सुरनकोट इलाके दा दौरा लाया। मंत्री दा औहदा संभालने मगरा अपने पैहले पैहले पुंछ दे दौरे दरान मंत्री हुंदा सुआगत जिला प्रशासन ते सिविल सोसायटी दे संगठनें आस्सेआ कीता गेआ। पीर दी गली च किट्ठे गी संबोधत करदे होई मंत्री होरें आखेआ जे उमर अब्दुल्ला हुंदी अगुवाई आली सरकार लोकें दिए विकास सरबंधी आसें तांगें गी पूरा करने लेई वचनबद्ध ऐ। जावेद अहमद राधा होरें लोकें दे समर्थन लेई आभार जतांदे होई आखेआ जे ओह पूरी तनदेई ते निष्ठा कन्नै खित्ते दे विकास ते खुशहाली लेई कम्म करगंन। इस मौके पर मंत्री होरें पीर की गली च दरगाह लाई शरीफ दे श्रद्धालुएं लेई यात्रा गी सखल्ला बनाने लेई खास सुविधां कायम करने लेई गलाया।

<><><><><><>

Baba Banda Bahadur

श्री बाबा बन्दा सिंह बहादुर जी हुंदी 355मीं जनम जयंति दे सिलसिले च कल फौज दी 25 इन्फैंट्री डिवीजन दे मेजर जनरल गौरव ऋषि, शौर्य चक्र सेना मेडल, होरें राजौरी दे नारिया च लाए गेदे राष्ट्रीय झंडे आली थाहरै कश, जरनैली शिड़क एनएच—144—ए कंडे श्री बाबा बन्दा बहादुर हुंदी मूर्ति परा परदा गोआड़ेया। 27 अक्टूबर 1670 गी जम्मू कश्मीर दे राजौरी क्षेत्रें च रामदेव हुंदे परोआर च जनमे बन्दा सिंह बहादुर हुंदा असली नां लक्ष्मण देव मन्हास हा। 15ब'रे च उनें सन्यासी बनियै तपक रने लेई घर—बाहर छोड़ी दित्ता ते माधच दास वैरागी नां कन्नै मशहूर होए। सिक्ख पंथ दे संस्थापक श्री गुरु गोविंद सिंह जी उनेंगी पैहली बारी 1708 च महाराष्ट्र दे ननदेव च मिले हे। ना पुच्छने पर उनें अपना तारुफ “गुरु का बन्दा” आखियै कराया जेहदे पर श्री गुरु गोविंद सिंह जी होरें उनेंगी बन्दा सिंह नां दित्ता। उनें मुगलें दा एह भ्रम त्रोड़ेआ जे उनेंगी कोई र्हाई नेई सकदा ते गुरु जी साहेब जादें दी शहादत उा बदला लैता। इत्त फरक कन्नै बाबा बन्दा सिंह बहादुर हुंदी जनम तरीक बी 27 अक्टूबर ऐ जदू ज अज्ज इन्फैंट्री दिवस मनाने हा ते कल इस मौके पर उंदी मूर्ति दा

अनावरण कीता गेआ ते इस एद्घाटन दे बाद इस थाहरै गी हुन “बाबा बन्दा सिंह बहादुर मोड़” कन्नै जानेआ जाग। इक महान योद्धा होरें दे नाते बाबा बन्दा सिंह बहादुर राजौरी दे लोकें लेई इक प्रेरणा स्रोत न ते ओ इस गल्लै पर मान करदे न जे बन्दा बहादुर हुंदा जनम राजौरी च होआ हा ते जरनैली सड़कें कंडे उंदी मूर्ति दिक्खियै मते शा मते लोकें गी उंदे उंदे बारे पता लग्गोग ते उंदे अंदर बी उंदी दलेरी गी लेइयै मान–सम्मान ते फख दी भावना पैदा होग।

